

書室漫寄

星海記

銀燭朝天紫陌長
禁城春色曉蒼蒼

追薦諸亡友啓

尤展成

江南離亂。三變滄桑。吾黨風流。半凋霜露。徐子寄邵。濺血
鸚鵡之洲。馬屍未裹。劉子右銘。懷沙杜衡之浦。魚腹長埋。
顧子子臨。臥文園而不起。蕙嘆芝焚。華子壯興。入舞帳以
無還。雉罹兔網。風寒易水。悲白虹貫日之年。潮怒錢塘。思
素馬揚濤之夜。長沙賦鵬。湘江之弔無期。中散彈琴。廣陵
之傳遂絕。兼之陸子靈長。華亭喉鶴。一去三秋。湯子卿謀。
簫管飛鸞。雙歸二載。淚碑猶濕。笑石難逢。鄴中之七子。奄
然林下之五君。盡矣。某等追尋風雨。感愴山河。讀庾蘭成
思舊之篇。傷心鬼錄。咏陸士衡哀逝之賦。流涕人文。天問

座

無辭魂招不返。用擇下元之節。爰延山刹之僧。廣建道場。
宏修法事。考天宮之鐘鼓。即登般若之臺。邀地府之衣冠。
共禮菩提之樹。滿空花雨。我佛如來。大地蒲團。故人必喜。
願潔椒漿之薦。先薦空王。并賻束帛之資。轉資香火。庶幾
虔心貝葉。無勞分范氏之舟。稽首猊牀。不異挂徐公之劍。
非同托鉢。勿靳傾筐。

徵輓重楣夫人詩啓

閨秀 林亞清

蓋聞河洲廣樛木之章。漢殿有秋風之咏。猗歟妙技公孫
之脫渾。瀏漓麗矣玉臺徐陵之錦心。繡口書仙司案本自
天來。神女行雲不辭峽降。衛夫人之墨妙如斯。元皇后之

誅辭猶在斯固香奩絕調久播人間彤管遺音常留斯世
者矣若乃深閨秀質文苑仙姝系出名楣幸同桑梓長依
戚里願比金蘭女士景其素心風人訝其纖手詞源奮發
羞言謝女雙蛾學海蟬聯笑並班姬半靨花開兮將謝月
滿兮易虧長樂曉鐘鳴不返芝田之駕蓬山春雨暗驚回
魚嶺之車硯匣琉璃午夜漆燈留黯淡筆牀翡翠三春花
影伴幽妍蠹魚三食神仙衣塵欲化陽鳥一聲歸去薤露
將晞變彼諸姬永隔池塘之夢有齊季女新傳蒿里之歌
賦自香閨彩筆陳而石麟生色詞分銀管歌珠咽而金盃
增光是耶非耶其人斯在酌之酢之麗句常新若非敬籍

鴻篇垂之金石會見近鄰燕麥托此荆蓁謹奉片言諒垂
嘉諾然脂暝寫競看神龍蠖屈之書弄墨晨裁再覩白雪
陽春之曲三臺妙跡遠從瑤島飛來五色花箋近自漢宮
傳出連城琬璧欣開泉下蛾眉徑寸珊瑚敢奉詞壇牛耳
凡我同志毋爾遐心

徵忠孝節義貞烈豪俠隱逸高人事實作傳啓

竊惟綱常名教維持端在斯人忠孝節廉表章要有同好
所恨者事更朝代世迥異而人湮亦或有人限方隅地殷
遙而事隱蓋自傳聞或略紀編或略賢豪與草木以同休
以致姓氏不傳閭里不傳精英等烟雲而速化嗚呼智愚

誓

同盡邪正莫稽非有撫實之書則潛德之幽光不著一世
人心靡自奮興弗藉蒐羅之力則閭修之獨行將遺千古
信史何由採擇某才慚五傳學之三長念二十年來潦倒
風塵詎有彤管之責乃千百世下盱衡往古寧無腐史之
心伏見北海逋臣東林樵子或種花彭澤植五柳以鳴高
或抗節燕臺蹈千死而不悔心傷破國言欲捐軀又有感
切蓼莪情深岵此愚孝死孝俱為孝思之所鍾諭親順親
罔非親心之最樂爰徵事實用勸閭閻以至方外高人寰
中俠客或孤懷獨往或抱膝長吟或吹劍雲中或釣鼇海
上既立名砥義各擅一奇則彰往詒來亦堪千古然此瓌

德疇行必有師友學問之助夫是以分途任道以希聖賢
獨至婦人女子本無詩書禮樂之陶亦何以銳意成仁以
擔名教嗟乎天路茫茫唯存浩氣泉臺寂寂尚有精靈奈
何血性猶存竟令表章不至雖人之為善非為名然而予
每有心必勤撈取伏願慈孫孝子哲士仁人或目擊或耳
聞悉其事明以告予或前朝或近日筆之書將以問世此
雖迂闊亦有苦衷聊為衍數萬言以發潛光不過云爾如
謂寬千斛米始作佳傳則曰未然

處州劉郡侯德政徵詩文啓

扶風晝永慶四民之二天渤海春深釀五風而十雨高山

仰止愧培塿之難幾滄海納流幸涵濡之久被軒鏡照穿
墉之鼠玉壺映懸釜之魚二千石念民瘼耶暫寬宵旰五
百里得賢守矣久切雲霓矧列斗樞敢忘星戴恭惟劉太
老祖臺噢咻萬姓卯翼十城夢感弧星知百世之功勳有
自瑞徵玉印識一門之忠孝無雙帝方重念此邦公遂
擢膺斯命褰帷至止朱幡分日月之光攬轡澄清操羽壯
山川之色學祥鸞薄擊鷲甘霖偕惠日以為休芟稂莠長
嘉禾紫電並青霜而著令賣刀買犢四郊登衽席之安今
袴昔襦萬姓識桑麻之樂在敝郡以兵燹之餘民多殯首
而使君用清靜之化治等烹鮮每勤閉閣之思蒲鞭罰措

雅慕焚香之告包匭風清春暖花開已擅兩岐之頌秋來
風冷更傳五袴之謠善政難罄竹而盡書厚德同高岡而
並壽尤稱異者更有甚焉振起人文裁遺音於正始方興
義塾訓小子以大成黈毳寵鶴必假翰於林公局趣轅駒
幸揮鞭於伯樂兼之解衣推食藉以舉火者萬家因而秣
馬脂車其究安宅乎百里四郊旱魃禱甘霖以解倒懸百
室馮夷奠波臣以救饑孳是真仁人長者之用心能使鰥
寡孤獨之得所鳩形鵠面悉起瘡痍茹檠飲冰專為黎庶
上體天子已飢已溺之心寧受陽城之考俯閔斯民靡室
靡家之苦定膺卓茂之褒投難任鉅人方踧踖而不前錯

節盤根公乃趨蹌之恐後安詳肆應初無膠柱之情談笑
推移旋有奏刀之効市廛不擾杼柚無驚非公之恩伊誰
之惠行看寵賁北宸展一麾而邁往今日化行南國具十
郡之觀瞻某等幸戴福星欣懷化日滄浪之水為我侯而
清操隨波淡縹緲之峯同我侯之峻名與山齊用矢蛙吟
於下里繫天籟之無私因邀鴻筆於同人諒秉夷之共好
分珠璣之異彩集鐘鼓之殊聲惟祈才似潘尼琳琅振響
文如孫楚錦繡成堆彩毫落處固宜麗以金箱黃絹題來
豹欲壽之文石訂成佳帙叶白鳳以多奇傳播流芳附青
錦繡不朽共抒誠悃敬答鴻庥

雅慕

新安汪烈女徵詩啓

毛奇齡

鳳聞星名婺女並日月以經天竹號湘妃凜冰霜而照地
黃鵠孤飛之曲直寫貞心青鸞獨舞之篇尚存樂府永惟
慕義人以文傳藉是揚徽言為德旨恭惟汪烈女者補侯
州司馬泰伯年翁之女也英鍾江左秀毓婺源質本端莊
不待母儀之教性成婉婉無煩女訓之頒親色笑於堂前
因心孝友辨聲音於絃上絕世聰明語彼幼穉之年便異
尋常之志丈夫自命絕嫌巾幗之妝名節素矜大有鬚眉
之氣盈盈十五不事花鈿粲粲玄黃惟嫻機杼此其槩也
抑又難焉假若勿罹顛危其孰見殉親之孝子不遭板蕩

末由彰許國之忠臣爾其蚤邁鞠凶酷遭慘罰甫經許字
倏傷玉樹之摧未逮結褵遽悼臺榭之逝仰天一慟城欲
全崩指日長號玉思立碎惟時慈親灑淚幼弟牽衣爰飲
血而躊躇終旌心而慷慨身既為女色養之誼無關人曰
未亡殉夫之志已決遂乃長辭炫服屏棄鉛華暫設像形
禮瞻朝夕江郎遺筆空生夢裡之花季女懷人羞化望中
之石溯三生之有訂未綰同心誓九死而不移願成比翼
桃花水煖門前之泛漲方深柳絮風輕閣內之吟聲遂絕
於是衣裳密縫抱石輕沈鬟髻堅盤望波一躍雖復蒼梧
躊躇誰回湘水之深深即令華表鶴歸莫敘佳人之汎汎

雅烈罕聞於往古清貞可厲乎風聲更可異者遺屍拱立
迅湍渟壑而不流香霧氤氲居舍經旬而未散是則鬼神
於焉呵護天地為之感愴者矣其尊人秦伯來我浙右術
效陶朱寄籍武林行同高士有茲令女想見家風行見廟
貌祠宮緘蠟丸而上請金書綠字偕鳳詔以來旌夫被服
詩書猶有近名之念深居閨閣孰非至性所為劉子敬執
策而書重編列女張茂先殺青以誌應補史箴欲垂不朽
篇章敢懇立言君子被諸金石允堪砥俗之型叶彼宮商
用俟採風之獻謹啓

徵張師仲六十詩文啓

光流東海雲開不夜之天瑞溢西崑秀挺長生之樹延年
酒美瓊膏滴瀝唯澆奇士之心胸長樂花開玉蕊歲華自
媚高人之杖履師仲張年翁名邦喆彦上邑名儒赤鯉溪
邊共識神仙窟宅桃花潭上咸欽供奉風流助既得夫地
靈德更成於家學泛一槎於銀漢博望助高載十乘之瑤
編瑯嬛富有遙遙華胄自昔為然奕奕英才於今益烈爾
乃幼而敏慧少即神奇楊梅作對於髫齡鸚鵡成篇於頃
刻揮毫萬字霜騰墨圃之貌泚筆千言霧起文淵之蜃奮
蜚宮之赤幟牘冠三千採璧水之青芹年纔十五期釋褐
留華年望牽絲於綺歲葵始花而應能向午松纔幹而即

雅摩霜無如茫茫碧落每如名流漠漠黃輿恆湮志士蒼
顏一瞬潦倒蟲魚細碎之中壯血三升消耗亥豕校讐之
下具挾電鞭霆之筆不克凌雲負騰蛟夢鳥之姿未能化
鳳青衫憔悴蜀相如竟爾長貧白髮蕭疎朱買臣何時得
貴於是傳經後進息意前征擁上座之皋比豎西賓之軌
範摳衣入拜遠來龍眠天柱之英具贅相延遙至南翼鄧
城之域表章絕學緯地經天著作雄文奔泉倒峽儼當年
之安定直此日之橫渠况夫至行過人貽謀善後繽紛萊
綵偏深愛日之誠穩安潘輿克盡承歡之志既脯牯羶薌
之必備復禪虞祥練之無愆鴻案如賓鹿車似友樓名花

萼秀共競夫芬芳盟締金蘭堅可渝夫膠漆巖然麟角茁
玉樹於庭階煥矣鳳毛弄明珠於掌握某託比鄰幸親芳
躅蓋名士有寓公之號僑居朱雀橋頭而高人來客子之
稱寄跡烏衣巷口琴樽雅吹久知平子之淵通輿騎經過
因識九齡之德望今際三秋之月適逢六袞之辰簪履盈
門人效麥邱之祝襟裾滿座客為芝島之賓八公吹紫珮
之簫四皓鼓金絃之瑟三千桃實都從度索攜來十丈蓮
花却自秦城將至固廣徵夫珠玉以少誌於賡揚九日匪
遙百仞峰頭佇酌無憂之酒千齡是祝萬年枝上先開稱
憂之花